

Transkription von Urkunde HST 1391a

Ort, Datierung: Stralsund, 1391-07-18

Signatur: Stadtarchiv Hansestadt Stralsund, StU 0534 [\[online\]](#)

Inhalt: Elzebe Donynghes: Quittung

Vor al den jenen de dessen bref zeen ofte horen lezen bekenne ik elzebe wedewe wolter dōnynghes guder / dachtnisse wandaghes borghere to deme Sunde dat ik mit willen . witschup vn(de) vulbort mynes leuen omes / hern arndes vōt mynes nōghesten erfname(n) rechte vn(de) redeliken to eneme ewighen kope hebbe vor . koft / dem bescheden ma(n)ne yūriges brunswike borghere to deme Sunde vn(de) Tylzen ziner husurowen vn(de) erer / beyder erfnamen twelf mark gheldes . de wolter vorben(omede) vn(de) ik hadden ghekoft van Johannes vn(de) iacobe / broderen benomet tribuzes in eneme houe to dem kedinghehaghen na vtwisynge des breues den / ze dar vp hebben ghegheue(n) Desse twelf mark gheldes hebben de vorben(omeden) yūries vn(de) zyn husurowe / van my ghekoft vor twe hundert mark . myn vyuentwyntigh mark sundescher pe(n)nynge my to der / nōghe eer der makynge desser breues wol bereth vn(de) ik geue en des macht dat ze moghen de / twelf mark gheldes vte(r) deme houe to pandende mit den panden towarende alze pacht recht is . upboren / alle yār to ewighen tiden ok moghen ze de twelf mark gheldes vorkopen vorgheue(n) vorsetten vn(de) in / gotlik deenst keren . weme vn(de) wor ze willen vn(de) desser kopes wil ik en mit myne(n) erfname(n) ware(n)de / wesen iar vn(de) dach vor alles weme he zi ghestlik edder werlik Vortmer beke(n)ne ik arnd vōt ratman / to deme sunde dat desse kop is gescheen mit myner witschup vulbort vn(de) wille vn(de) hebbe to ener / warheit der vulbōrt myn yngheseghele ghehengh(et) vor dessen bref wente ik hebbe ouer deme kope / ghewesen vn(de) mit my hebben dar an vn(de) ouer wesen De Erbare lude Johan wesend de voghet to deme / sunde her tiderik schele ratman vn(de) ghert kargow borgh(er)e dar sulues de ere yngheseghele to ener / tūghnisse ok hebben ghehengh(et) dorch bede willen myner leue(n) moddere Elzebe vorben(omeden) vor dessen / bref Ghegheue(n) to dem Sunde Na godes bort drutteynhu(n)dert iār i(n) dem ene(n)neghentigheste(n) iare / des dinxstdaghes na der apostele daghe alze ze ghedelet würden